

Regional News Unit AIR Aizawl
Thursday, July 18, 2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

- Churachandpur leh Aizawl inkara helicopter thlawhtir leh turin ruahmanna siam mek a ni a, naktuk hian thlawh tantir theih beisei a ni.
- Sorkar laipui chuan Mizoram a Myanmar raltlan te biometric hmanga chhinchhiah hna kalpui tur hun chu December thla thlengin a pawtsei.
- Haryana sawrkar chuan Agniveer te tan police, mining leh jail department hnarukah zaa 10 seat hauhsak a rel
- Railway Protection Force (RPF) chuan kum sarih kalta chung khan Operation Nanhe Faristey beihpui an thlaknaah naupang sing 8 sang 4 an chhanchhuak tawh.



COPTER

Churachandpur leh Aizawl inkara helicopter thlawhtir leh turin ruahmanna siam mek a ni a, naktuk hian thlawh tantir theih beisei a ni.

Manipur sorkar Transport department chuan kumin June ni 27 a an tihtawp tak Churachandpur leh Aizawl inkar a helicopter service chu chawlhkar khata vawi khat ni lovin vawi hnih thlawhtir turin hriattirna a chhuah a. Tun kar Thawhtanni, July ni 15 atanga thlawk tan tura tih a nih laiin Mizoram sorkara Civil Aviation lam an hriattir tlai a. Thlawh tan tur ni atana ruat Thawhtanni hma Pathianni-a an hriat ve chauh avangin an inbuatsaih hman ta lova. Tunah hian Zirtawpni, July ni 19 a thlawk tan hman ngei tura ruahmanna siam a ni. Ruahman dan chuan Thawhtanni leh Zirtawpni apiangin helicopter hi a thlawk thin dawn a. Churachandpur atanga lo thlawk hi Aizawl Mualpui helipad-ah a lo tum ang a. Haw lamah Lengpui tumhmun tlawh hmasa-in Churachandpur-ah a kir leh thin dawn a ni. Ministry of Home Affairs remtihna-in nikum September ni 27 khan Churachandpur leh Aizawl inkar helicopter service hi a thlawk tan a, kumin June ni 27 khan tihtawp lailawk niin tunah hian chhonzawm a ni leh dawn ta a ni. Helicopter hman man za zela 75 hi MHA-in a tum (subsidise) sak a ni.

Helicopter service hi a bik takin Churachandpur district leh Manipur tlangrama chengte tan a tangkai hle a. Imphal thlawhna tunhmun hnai hle mah se tlangmite tan kal ngam a nih loh bakah phai leh tlang ram mite an inthen fel a, an inawmpawlh tawh loh avangin kal chi a ni lova.

Lirthei hmanga kalin Churachandpur leh Aizawl inkar hi km 330 vel a ni a, kawng a chhiat avangin darkar 15 vel kawngah hun an hmang thin. Chutiang chu an dinhmun a nih avangin Manipur pawn lama enkawl tur damlo phurh chhuah pawh a hautak hle a. Helicopter a thlawh leh chuan an harsatna tam tak a sukiang dawn a ni.

<><><>

LAWNGTLAI DC ORDER

Lawngtlai District Magistrate Cheemala Siva Gopal Reddy chuan Bharatiya Nagarik Suraksha Sanhita (BNSS) in thuneihna a pek hmangin Lawngtlai District ah Tuialhthei khuahkhirhna thupek a chhuah.

Lawngtlai District Magistrate chuan Lawngtlai District chhung a Filling Station te chu tuialhthei a man bithliah ai a sanga hralh chhuak lo turin a ti a. Myanmar leh ramdangah sumdawna kaihnawihah tuialhthei pekchhuah a remti lova, Lawngtlai District chhungah dan lova tuialhthei lei leh phurh luh a khap bawh a. Thupek zawmlo chu dan anga hrem an nih tur thu District Magistrate thupek chhuahah tarlan tel a ni bawh.

Central YLA in Myanmar a Tuialhthei thawn luh tur an dan chu chhonzawmzel an tum thu an sawi a. Central YLA in dan kalha Rakhine State a Tuialhthei lut tur an dan chu Sorkar tha tichak turin chhonzawm zel an tum thu an sawi a, an thiltih chu ramchhung mite inhrek tumna a ni lo tih an sawi nawn a. Lawngtlai District Magistrate in tuialhthei khuahkhirhna thupek a chhuah chu lawmawm an tih thu sawiin, ram pawna tuialhthei hralh chhuah chungchanga inhmuh thiam lohna awm ni a langte chingfel turin Central Young Lai Association leh Mara Thyutlia Py, General Headquarters, Siaha nen dawhkan kila inbiak thuai an tum niin Central YLA hruaitute chuan an sawi.

Rakhine lam mi, Lawngtlaia tangkhangte'n an ram an pan theih na'n YLA chuan ruahmanna a siam mek a, ramdang nena tuialhthei ni lo, thildangah indawrna awmze nei zawka kalpui a nih theih na'n an huamchhungah ruahmanna siam an tum a ni.

<><><>

BIOMETRIC ENROLMENT

Sorkar laipui chuan Mizoram a raltlan mek Myanmar mi 33,800 chuante biometric hmanga chhinchhiah hna kalpui tur hun chu December thla thlengin a pawtsei.

Home department atanga thu dawn danin Myanmar raltlan Mizorama an sahimna atana awm mekte biometric hmanga chhinchhiahna tur atan hian sorkar laipui thu hnuhnung nghah mek a ni a. A hma lama Ministry of Home Affairs (MHA)-in biometric enrolment portal a siam chu ramdangmi India rama rawn lut, an rama thawn let turte tana duan a nih avangin siamthat a ngaih thu home department chuan an sawi a. Siamthat rawtna an thawn hi MHA lam chuan an la rawn chhang lo.

Union Home Minister Amit Shah chuan chief minister Pu Lalduhoma hnenah Myanmar raltlante chu an rama muanna tluan tling a awm hma chuan thawn kir an nih loh tur thu a lo tiam tawh a. Chuti chung chuan thawn kir turte puala biometric enrolment portal an rawn duan leh si avangin siamtha tura an ngenna chu Mizoram sorkarin a nghak mek a. June ni 18-a council of ministers thukhawm chuan sorkar laipui-in Myanmar raltlante biometric hmanga chhinchhiah tura thu thar a rawn neih leh chuan kalpui nghal mai ni se tiin an lo rel tawh a ni.

Myanmar raltlan an tam lai khan mimal tin chanchin (biographic data) lak a lo ni tawh a, mi 35,011 te chu chhinchhiah an ni a. Mi 28,635-te chu identity card pek an lo ni tawh bawk. Kar kal ta chhung khan Mizorama awm mek Myanmar raltlan zinga 12-te chuan an awmna Kolasib an chhuahsan ni a hriat a ni a. Myanmar-ah an kir leh nge Mizoram pawn hmun dangah an kal tih hriat chian a la ni lo. Heti hian tun dinhmunah Mizoramah Myanmar raltlan 33,823 an awm mek a. An zinga 10,141 hi mipa an ni a, hmeichhia 10,791 awmin naupang 12,891 an awm bawk a ni.

<><><>

GRAPE WINE

Kumin hian Hnahlan leh Champhaia Grape chingtute tharchhuah Grape chingtu Pawl, Grape Growers Society ten an lei zawh theih hmel loh ni a thudawn a ni.

Hnahlan leh Champhaia Winery enkawltute hnen atanga Champhai a kan Corr. sawi danin, kum kalta a Grape an lei atanga a tui an sawrchhuah thahnem tak hralh lohva a la awm avang leh a dahna tur an ngah tawk loh avangin Grape chingtu, an Society member te tharchhuah zawng zawng an lei thei dawn lo a ni. Champhai Grape Winery a sawr turin tun kar bul lam atang khan Grape rah lei tan a ni a. Nikumah quintal 1,069 an lei a, an beisei anga an hralh chhuah tam loh avangin zem ruak a tlem hle. Champhai leh a chhehvelah kuminah an grape-te rah tha mah se, rial leh thli-in a tihchhiat nasat avangin an beisei ang grape an thar thei dawn lo na a nikum chu an phak tho an ring. Tun dinhmunah Champhai Tlangsam Winery-ah hian Wine-a la siam loh Grape tui litre nuai 1 leh sing 3 bakah Wine-a siam tawh litre 9,000 vel chhek khawl sa an la nei mek.

Champhai Grape Growers Society chuan Champwine bakah Wine thar, Champwine Premium siam chhuak turin hma an la mek a. Excise & Narcotics atangin label approval an hmu tawh a, a man bithliah zat tur hi Excise Dept changtu Minister pawmpui turin file a kal mek a. An tihfel veleh Champwine Premium hi hralh chhuah theihin an peih fel nghal dawn tih Winery-a thawkte chuan an sawi bawk a ni.

Hetihlai hian Hnahlan Grape Grower Society chuan vawiin atangin Grape rah an lei tan ve thung a, Hnahlanah hian Grape tui sawr sa zem 4, Litre 40,000 (Sing li) vel hralh chhuah lohvin a awm mek a. He hmuna Wine an siam, Isabela chu Saidawium (Bottle) a thun a nih rual rualin an hralh chhuak thei zel rih a ni. Hnahlana Grape chingtute hian rial leh thli avangin harsatna an tawk lova, kumin hian Grape hi an thar tha turah an inngai.

Nikum khan Grape rah quintal 1,000 vel an lei a, kuminah chuan nikum aiin Grape lei tam theih an in beisei a ni.

<><><>

RD MINISTER

Rural Development Minister Prof. Lalnilawma chuan Mizoram State Rural Livelihoods Mission (MzSRLM) hnuaiia SHG member te internet kaltlangin a kawm a.

He hunah hian RD Block 28 a Self-Help Group (SHG) member te telin SHG member-te atangin MzSRLM kaltlanga an hamthatna hmuh te leh hma an sawnna te ngaihthlak a ni a, hei bakah hian SHG Member te atanga zawhna awmte chu Minister hian a chhang bawk a ni. Self Help Group tihchangtlun zel dan tur leh nasa leh zuala SHG member-ten hma an lak zel theih dan tur sawiho a ni bawk. Mizoram State Rural Livelihoods Mission (MzSRLM) hnuaiia hian District 11 leh Rd Block 28 ah hmalak mek a ni a. An hnuaiia hian SHG 10,425 din an ni tawh a, member 81,829 an awm mek a ni. SHG member te hi eizawna ngelnghet an neih theihna turin kawng hrang hranga puih niin Community Funds an puk tur pek an nih bakah an eizawna atana an mamawh training hrang hrang pek thin an ni bawk.

Prof. Lalnilawma hi Rural Development Commissioner & Secretary Pu R. Zarzosanga leh Pi H. Lalchhandami, Chief Executive Officer, MzSRLM ten biak-hmuh-theih hmanga inkawmhona-ah hian an telpui a. District hmunpui leh Block hmunpui atangin Project Directors leh BDO ten an telpui bawk a ni.

<><><>

PALMOIL EXTRACTION PLANT

Thawhlejni khan Mamit district-a Tuidam khua-ah palmoil hmanga eirawngbawlina tel her chhuahna khawl chu her chhin a ni.

Mamit District Cooperation Office huaihawtin Mamit District chhunga a hmasa ber atan Tuidam khua-ah Tuidam Oil Palm Farmer Cooperative Society Ltd. te tana Palm Oil hmanga eirawngbawlina tel her chhuahna khawl, her chhina hun hman a ni a. Mamit MJA leh District Information and Public Relations Department-ten he hun hi an hmanpui. Mamit District Cooperative Officer Pu Lalthingfala chuan palmoil herna khawl chuan ni khatah palmoil quintal 10 a her chhuah theih dawn bakah ni khatah palmoil hriak litre 200 leh cake kg. 300 a her chhuah theih tur thu a sawi a. Pu Lalthingfala chuan palmoil her chhuahna khawl bun na'n leh a in sak na'n cheng nuai 22 leh sing 5 an hmanral tawh thu a sawi a. Palmoil her chhuahna khawl chu hman theih a peih fel a nih hunah chuan a chingtute'n an thar chhuah te chu tuna an hralhna rate aia hlawk zawk, a let thuma hlawka an hralh theih tur thu he hun ah hian a sawi a ni.

Mamit District chhungah hian Cooperative Society 115 awm mekin, hmalakna hrang hrang an kalpui mek zel a ni.

<><><>

AGNIVEER IN HARYANA

Haryana sawrkar chuan Agniveer te tan police, mining leh jail department hnaruakah zaa 10 seat hauhsak a rel. Nimin khan Haryana Chief Minister Nayab Singh Saini chuan he thu hi puangin zaa 10 hauhsakna hi constable, mining gaurd, forest gaurd, jail warden leh SPO ah te kalpui a ni ang a ti a. Hei bakah hian Agniveer te chu group D ah kum 3 ngaihnathiamna pek an ni bawk ang a ti.



RAILWAY PROTECTION FORCE

Railway Protection Force (RPF) chuan kum sarih kalta chhung khan Operation Nanhe Faristey beihpui an thlaknaah naupang sing 8 sang 4 an chhanchhuak tawh. He beihpui hi kum 2018 May thla atanga kalpui niin Railway Ministry chuan Indian Railway zone hrang hranga naupang enkawl leh venhim ngaite chhanchhuah beihpui thlakna anih thu a puang a. RPF te hian naupang an chhanchhuah apiang te hi District Child Welfare Committee te hnenah hlanin anni hian an nu leh pa te hnenah an hlanchwawng leh thin a ni.



OMAN

Oil tanker lawng pila chuangte zawng turin Indian Navy lawng lian leh P-8I thawlhna te Oman ah tirh a ni. Puan tawh angin Oman-a tuialhthei phur lawng chesualah hian achhunga hnathawk India mi 13 telin mi 16 chin hriat lohin an bo a. Midang pathumte hi Sri Lanka mi an ni a. Oman Maritime security centre sawidanin Thawhlehi khan he bungraw lawng hi a pil a. Lawng hming hi Prestige Falcon niin Oman industrial port of Duqm kiang, Ras Madrasah chhim chhak Nautical Miles 25 a hlaah lawng hi a pil a. Chetsualna thlen chhan hi hriat ala ni lo.

Lawng chesual hi Yemeni port of Aden pana kal a ni a. Chhanchhuah hna ngawrh taka thawh niin tumah chanchhuah an la awm lo a ni.

